


Sveinbjörn Egilsson  
rektor.

Rv. 1855.









# RÆÐUR,

fluttar við jarðarför

## Sveinbjarnar Egilssonar,

Rektors og Drs Theol.,

27. dag ágúst. 1852.

---

Gefnar út

að tilhlutun og á kostnað ekkjufrúarinnar,

H. Egilsen.



---

REYKJAVÍK.

Prentaðar í prentsmiðju Íslands, hjá E. Þórðarsyni.  
1855.

RAEDUR

Hollar vid Jorden

Stefan J. Eklund

1875

1875

1875

1875

H. Eklund



1875

1875

1875

# I.

## Húskveðja,

flutt af

dómkirkjupresti, prófasti herra **A. Johnsen.**

**M**oldin hlýtur að hverfa til jarðarinnar aptur, hvar hún áður var; — en áður vèr berum hana í jarðarinnar skaut, til grafarinnar, þá dvelur kærleikinn hér litla stund í sárri endurminning. Því það er sæt nauðsyn fyrir hina eptirlifendu einmitt á þessum stað, að flytja þeirra andaða ástvin hina síðustu kveðju. Dauði, skilnaður, burtför, hve bitur eru þessi nöfn! hve mjög hrífið þið á hvers manns hjarta með þeim sviða, sem eingin túnga fær lýst? Skyldi nokkur sá vera til, hverjum guð hefir veitt tilfinning fyrir kærleika, sem hann hefir látið smakka þá gleði, sem kærleikur veitir, skyldi nokkur sá vera til, er lifir í sambúð við elskaða vini, að hjarta hans komist ekki við í innstu fylgsnum, svo opt endurminning sofnaðra ástvina stendur lifandi í huga hans? Ó, það er húsaðirinn, sem nú á að út-berast úr hans jarðneska bústað; það er kennarinn, sem nú ætlar að segja skilið við sína fyrri lærisveina, samþjóna og vini; það er vísindamaðurinn, sem nú

ætlað að yfirgefa þann bústaðinn, hvar hann seint og snemma rækti vísindamannsins helgu köllun; það er ektamakinn og faðirinn, sem nú skilur að sýnilegum návistum við maka og börn. Ó, hver af oss, sem stöndum í kring um þessar líkbörur, á hús og heimili, og finnur ei, hvað önnur eins stund og þessi ber í skauti sér? Hver af oss, sem hèreum staddir, og höfum notið tilsagnar hans, sem hère liggur lík, getur sæð svo þessar líkbörur, að hann ekki renni huga til fyrri daganna, að hann ei lifandi minnst þess, er hann sat við fætur þessa elskaða læriföður, að hann ei af heilum hug þakki honum það þekkingarsæði, er hann sáði í sálu hans, þann vísinda - anda, er hann blès í brjóst honum, það fagra eptirdæmi sannkallaðs vísindamanns, er hann gaf honum? Hver af þeim, sem fyrr eða síðar vann með honum að sama verki, að menntun hinna úngu, hver af þeim mun fá svo kvadt hann nú í síðasta sinni, að hann ekki af öllu hjarta þakki honum ástrika samvinnu, þakki honum þá mörgu skemmtunarstund, þann margfalda lærdóm, sem hann hefir haft af hans góðlátlegu umgeingni, hans uppbyggilega tali? Hinir seinni samþjónar hans í þessu starfi hafa beðið mig, í sínu nafni að flytja honum þessa kveðju, og eg gjöri það hère með af heilum hug.

Og hver haldið þér þá að sé kveðja hinna eldri samþjóna hans, sem, eins og hann, höfðu feingið hvíld frá því verki, hverju þeir, eins og



hann, höfðu helgað allt sitt líf, en ekki enn nú hafa feingið lausn frá þessa lífs fallvöltu veru? Mun ekki þeirra kveðja einnig anda hinum sárasta söknuði, hinu heitasta þakklæti, hinni innilegustu eptirláangan, að fá að vera þar sem hann er, hjá honum, sem tekur vilja fyrir verk, sem setur þá yfir mikið, sem hér voru trúir yfir hinu minna?

Og þér, hans vinir og kunníngjar, þér, sem fyrr eða síðar bunduð vináttu við hann, fáðið þér svo litið þetta náföla lík, að sár sorg ekki skeri hjarta yðar, sár söknuður fylli brjóst yðar, og að þér af innsta hjartans grunni þakkið honum alla hans tryggð, alla hans vinsemd, öll hans kærleikshót? Já, hver, sem ann þessu landi, hver, sem ann sönnum vísindum, skyldi geta svo litið þessar líkbörur, að hann ei með trega hugsni til þess, að hér er fallinn sá, sem með sínum lærdómi hefir gjört fósturjörð sinni einhvern hinn mesta sóma, unnið vísindunum ómetanlegt gagn, og sem mundi hafa gjört það enn betur, ef heilsu og lífs hefði leingur verið auðið?

Og hvílik mun þá kveðja þeirra, sem hans hjarta stóðu næst? Hve innileg og heit þeirra, sem nutu hans daglegu umgeingni, hverra yndi og stoð hann var, sem misstu með honum það, sem þeim var dýrmætast á jörðu, maka, föður, forsorgara, ráðgjafa og vin? Ó kærleiki, hve mikla gleði, en líka hve óumræðilega sorg býr þú jarðarinnar börnum? Hve opt ollir þú hjartanu þess sviða, sem ekkert

heimslán alveg fær deyft, djúpra ógurlegra sára, sem eingin tímaleingd alveg fær grædt? Og er það þá að undra, þó hún fljóti í tárur, hverri þú hafðir gefið hjarta þitt, þar með þér hnè í dauðans djúp hennar hálfa líf, — þó börnin grátandi standi í kríng um líkbörur þínar, þar eð það hjartað er kólnað, sem elsaði þau svo heitt, og þau nú eiga eingan föður framar á jörðu? Lættið á hjarta yðar, kæru ástvinir, með því að þylja guði yðar raunir, að úthella heitu tárablóði; það er fögur fórn hjartanlegrar elsku á gröf andaðs vinar, ástkærs maka, elskandi föður.

En tíminn er kominn, að vèr flytjum líkamanni (andinn er hjá guði) úr hans jarðneska bústað í guðs hús, svo að eins og það húsið var hið fyrsta, er veitti honum viðtöku, við hans inngang í þenna heim, og ávallt síðan var hans kærasti staður, eins sè það líka nú hið síðasta, er hann kveður við sína útgaungu hëðan. En þú, drottinn, vertú styrkleiki þeirra, sem með sárri sorg gánga hër á eptir líki þeirra ástvinar, og gef þeim að eignast þeirra sálir í þolinmæði. Annastú ekkju hins framliðna, hans afkvæmi, hans ætt; lát marga honum líka af henni kvikna landinu til gagns og sóma. Og eins og vor framliðni heilsaði oss við vora inngaungu í þessi hífýli með þeim sálmi, er vèr nýlega sýngum<sup>1</sup>, og lèt oss þar með líka sem sjá inn í sína guðelsk-

<sup>1</sup>) Á undan húskveðjunni var sýnginn sálmurinn 336 í Sálmabókinni.

andi, sann-auðmjúku sál, eins viljum vèr líka nú, áður vèr flytjum hëðan hans jarðnesku leifar, láta hann sjálfan tala til vor, heyra líka sem af hans eigin munni, hvað hann hefir að segja oss til huggunar, hvernig hann vill, vèr tökum því, sem hër er skeð, tökum hverju, sem mætir, og í því skyni sýngja þenna sálm hans:

Guð, sem allri gæfu ræður minni<sup>1</sup>.

Ó, svo far þá í friði elskaði maki, elskaði faðir, elskaði vinur, elskaði lærifaðir. Þar er einginn á því heimili, hvers sómi og stoð þú varst, sem ekki blessi þína minningu; einginn af öllum þeim, sem hër eru viðstaddir, af öllum þeim, sem þig rëtt þekktu, sem ekki með hryggum huga hrópi á eptir þèr sína síðustu kveðju. Far vel í Jesú nafni. Amen.

---

<sup>1</sup>) Nr. 344 í Sálmabókinni.

## II.

## Líkræða,

flutt í kirkjunni af  
dómkirkjupresti, prófasti herra **Á. Johnsen.**

Eg þarf ekki að segja yður, háttvirtu tilheyrendur, þér vitið það sjálfir, og jáið efalaust, að hér er hniginn til moldar einhver hinn bezt og merkasti sonur þessa lands; að það er dauðsfall einhvers hins mesta vísindamanns, sem í þetta skipti hefir kallað oss hér saman í guðs húsi; og eg þykist viss um, að einginn, sem hann rætt þekkti, og sem af heilum hug elskar þetta land og þess sóma, hafi svo heyrt lát hans, að sú ósk ekki hafi hreift sér í brjósti hans: „Drottinn, gef oss marga honum líka“, að hugur hans hafi ekki fyllt tregablöndnum söknuði. — Ekki hnè hann að vísu til jarðar að vordögum hans lífs, heldur að áliðnu sumri þess; ekki eptirlèt hann ekkju og börn í eynd og örbýrgð, án þess, svo framt honum var unnt, að hafa syrgt fyrir þeirra framtíð; ekki var honum hæðan burt kippt, áður honum gæfist tími og færi á, að sýna, hver hann var, að láta eptir sig liggja menjar dyggðugs og uppbyggilegs lífs. En þó sumri



hans lífs væri farið heldur út að halla, voru sálarkraptar hans samt óveiktir, sem að vordegi þess. Þó hann ekki eptir skildi ekkju og börn í eynd og örbyrgð, þá hefir hún samt misst þann, sem var hennar yndi og stoð, börnin ástríðasta föður, heimilið sína heiðurskórónu. Hann hafði að vísu aflokið miklu í heiminum, leingi verið sómi þess lands, hvers sonur hann var; en það sýndist, sem hann hefði getað verið það mörg ár enn, ef það hefði verið vilji hins alvísa. Já, það sýndist hart nær, sem hann má ske nú mundi verða það hvað mest; því einmitt nú var hann kominn í þá stöðu, sem hann bezt sýndist kjörinn fyrir, að lifa vísindunum, að starfa í þeirra þjónustu, án þess að hindrast þar frá af nokkurri jarðneskri sýslan. Og hver veit, hverju hann mundi hafa afrekað með hans gáfum, hans lærdómi, hans iðjusemi, ef leingra lífs hefði verið auðið, hve mikið vísindin hafa misst við hans fráfall? En lífsstundirnar voru á enda, og dauðans eingill kom, og sókti það, sem skaparans var, og líkaminn andvana liggur hær, búinn til moldar.

Og með hverju viljum vèr nú heiðra útför þessa mikla manns? vèr fáum með eingu betur gjört það, en með því að skoða hans líf, að virða fyrir oss hans dæmi; því hvorttveggja var næsta eptirtektavert, fagurt og heiðarlegt, og þess verðugt, að því sè á lopt haldið. Já, lukkuleg sú þjóð, heppið það land, sem á marga honum líka.

Vor framliðni, *doctor* **Sveinbjörn** sálugi

**Egilsson**, var fæddur í þenna heim að Innri-Njarðvík þann 6. marzm. 1791. Foreldrar hans voru merkisbóndinn Egill Sveinbjörnsson og Guðrún Oddsdóttir, sem þar bjuggu. Árið 1801 komu þau þessum syni sínum fyrir hjá konferenzráði Magnúsi sáluga Stephensen, sem tók að sér að sjá fyrir menntun hans, eins og svo margra annara, hvar á meðal ekki fárra helztu manna sona á landi hère, með hverjum vor framliðni þannig uppólst, og batt þann kunningskap og vináttu við, sem ávallt síðan við helzt, allt til dauðadags. Hafði hann þar fleiri kennara, og þar á meðal seinast þann, sem langt er hafinn yfir mitt hrós, stiptprófast Árna Helgason, frá hverjum hann með heiðri útskrifaðist 1810, og hvar eg ætla að hann fyrst hafi lært að þekkja og komizt í kunningskap við hinn mikla málfræðing, háskólakennara sáluga Rask, sem má ske með fram gaf tilefni til þess, hverja stefnu vísinda-iðkun hans einkanlega tók, og að það ávallt var hans kærasta iðja, að fást við norræn fornfræði. Eptir að vor framliðni var útskrifaður, var hann fyrst nokkur ár um kyrrt á landi hère, þar til hann sumarið 1814 sigldi til Kaupmannahafnar háskóla, hvar hann um veturinn eptir nýár — því ferðin niður gekk svo seint — tók hið fyrsta lærdómspróf með miklum heiðri, aðaleinkunnin var *dável*, og svo árið eptir hið annað próf, sem gekk svo vel, að aðaleinkunnin var *afbragðs-vel*, og hann sæmdur opinberu hrósi. Tók hann þá strax fyrir sig guðfræði,

og það með þvílíku kappi, að hann í byrjun ársins 1819 tók embættispróf með bezta vitnisburði. Hefi eg heyrt til þess tekið af þá verandi kennurum háskólans, hve fallegt mál hafi verið á hans skriflegu annsvörum, hve vel geingið frá þeim, og það svo mjög, að fáir hafi gjört það eins vel. Þetta sama ár, sem vor framliðni lauk sèr af við háskólann, var hann strax um vorið settur undirkennari við skólann á Bessastöðum; gegndi hann því starfi, á meðan skólinn var þar. En þegar af-ráðið var, að hann skyldi flytjast þaðan og hingað til Reykjavíkur, var hann feinginn til að takast á hendur umsjón hans, sem Rektor, þar eð sá, sem í 35 ár hafði haft það starf á hendi, beiddist lausnar frá því, og girntist hvíld eptir svo langt dagsverk. Sigldi vor framliðni þá á opinberan kostnað um haustið 1845 í því skyni til Kaupmannahafnar, hvar hann var um veturinn, en kom aptur um vorið, og tók við þessu starfi; hafði hann það á hendi, þar til hann veturinn 1851 beiddist lausnar frá því, sem honum allra-nádugast var veitt fyrir liðugu ári síðan. Hver að voru tildrög hær til, vil eg helzt leiða hjá mæri á að minnast, enda er það líka svo alkunnugt og nýskeð, að því væri of aukið, auk þess að því og öllu þar að lútandi er svo varið, að því væri bezt sem fyrst gleymt.

Vor framliðni var eingiptur; giptist hann 20. d. júním. 1822 júngfrú Helgu Gröndal, sem nú sárt-saknandi syrgir hans mikla missi. Hjónaband hans

blessaði guð 12 afkvæmum, hvar af 9 lifa, 3 synir og 6 dætur, sem öll eru ógipt, að tveimur stúlkum undanteknum.

Hvað heilsufar vors framliðna snertir, þá var það allt af gott, þó hann eptir útlitinu að dæma ekki sýndist sterkbyggður, og hann var eingri vanheilsu bundinn; þess vegna kom það öllum svo óvart, þegar hann 14 dögum fyrir sitt andlát allt í einu lagðist í rúmið, eptir að hann kvöldið áður hafði geingið til rekkju alveg heill og hraustur. Þó lítið á bæri, hafði hann að vísu laungu áður kennt þessa sjúkleika, sem þá lagði hann í rúmið, en ætist nú svo mjög við ofkæling, að hann þann 17. þessa mánaðar um hádegisbil varð hans dauðamein. Var þjáningin samt aldrei sérlega mikil, eða að minnsta kosti ekki nema með köflum saman, enda bar hann hana líka með honum vanalegri stillingu og þolgæði, án minnsta kveins og kvartana, sá dauða sinn fyrir laungu áður, og beið hans rólegur; því þó lífið væri ei leingra, en þetta, var hann samt má ske saddur lífdaga, og samvizka hans sagði honum líka, að hann ekki með ásettu ráði hefði viljað gjöra nokkrum mein. Máli og rænu hélt hann til hins síðasta, svo hann gat gjört þær ráðstafanir, sem hann vildi, kvadt vini sína og sent hinum sína síðustu kveðju.

Hvað gáfur vors framliðna snerti, þá vita allir, vissi hann ei sjálfur, að þær voru sérlega góðar og farsælar: skarpleiki, lipurleiki, smekkur, fegurðar-



tilfinning, allt hvað eptir öðru, og þess vegna einhver afbragðs-snilld á öllu, sem frá hans hendi kom, allt auðþekkt, sem hann hafði fjallað um. — Fróðleiksvinur og lærdómsmaður var hann hinn mesti, og það munu fáar vísindagreinir hafa verið, á hverjar hann ekki bæri gott skynbragð. Þó voru það einkum norræn fornfræði, sem ávallt voru hans mesta eptirlæti, enda mun líka óhætt að fullyrða, að hann hvorki fyrr nè síðar hafi átt þar í sinn jafningja, og að vart nokkur hafi ritað eins hreint og fallett, íslenzkt mál og hann, eða eins alveg haft það í hendi sèr, og yfir höfuð verið eins orðhagur. Skáld var hann eitthvert hið liprasta, og eslaust hið bezta nú lifandi skáld hér á landi; er margt þess konar til eptir hann, bæði á latínu og íslenzku, og nú seinast útleggíng Hómers kvæða í ljóðum, sem hann því miður ekki entist til að ljúka við, en sem að þeirra dómi, sem þetta hafa sèð, mun vera það meistaraverk, sem einginn mun treystast til eða vera fær um að fullenda. Margt er til prentað eptir hann; að nafngreina það hér, yrði of langt, en allt er það auðkennt einhverri sèrlegri snilld og vandvirkni, og þó mun margt enn nú óprentað; því hann var ekki sá, er þæktist af því, sem hann vissi, eða vildi láta mikið bera á því; nei, einginn gat verið lítillátari en hann, og lausari við alla fordyld, einginn hæverskari í sínum dómi um sjálfan sig, og vægari í sínum dómi um aðra; hann þurfti þess ei með að rýra aðra, til að hefja sig.

Í hvílkum metum hann var fyrir lærdóm, bæði fjær og nær, kom meðal annars í ljós í því, að honum alveg óvitandi árið 1843 af háskólanum í *Breslau* var veitt nafnbót læriföður í guðfræði. Árið eftir var hann kosinn heiðursfèlagi hins íslenzka bókmenntafélags, eins og hann líka strax við stofnun hins norræna fornfræðafélags var kjörinn orðulimur þess. Mun óhætt að fullyrða, að hann hafi verið einn af þeim, sem lagði grundvöll þess, eins og hann líka allt til dauðadags var þess öflugasta stoð, vann fyrir það, með ritum sínum studdi og efldi þess heiður.

Hann var allt af, eins og hann sást, tilgerðar- og hispurs-laús, hægur og hógvær, sí-glaður og góður, smá-spaugsamur, án þess að meiða nokkurn. Einginn gat verið orðvarari, en hann, og einhver skemmtilegasti maður í fárra vina fèlagi, guðrækin og guðhræddur, iðjumaður til dauðadags hinn mesti; skipti hann tímanum milli heimilis síns, vina sinna og um fram allt sinna vísindalegu starfa, sem voru hans matur og drykkur. Hvort heimurinn lét honum vel eða illa, var hann ávallt hinn sami, gedið ávallt spakt, jafnlyndið og stillingin óhöggud. Einginn gat verið friðsamari en hann, og minna fyrir að leita á aðra, og að komast í stríð. En legðist hann til mótstöðu, var hann þéttur fyrir. Hann var fáskiptinn um hagi annara, og var í því, eins og svo mörgu öðru, mjög ólíkur mörgum á vorum dögum, sem vegna afskiptasemi um annara efni gleyma því, sem sjálfum á herðum liggur. Í

nýbreytni þessara tíma tók hann lítinn þátt; honum leizt ekki á hana, eins og hann yfir höfuð vildi sem minnst bendla sig við heiminn. Hann vissi, að þeir, sem það gjöra, verða opt að ganga í berhögg við hann, en það var ekki eptir hans geði. Hann var of blíður og gæfur til þess, að honum gæti verið það lagið, að beita þeim strángleik, þeirri röggsemi, sem þar til útheimtist, of niðursokkinn í sín vísindalegu störf til þess, að hann gæti viljað eiga miklu við annað að skipta. Hve ástúðlegur maki hann var, hve blíður faðir, hve elskulegur kennari, hve tryggur vinur, þess mun leingi með söknuði minnzt verða.

Slíkur maður er þá hær úr garði geinginn, og eg vona, að eingum, sem hann rætt þekkti, þyki nokkuð ofhermt af því, sem hær hefir verið sagt. Oflof átti líka sízt við um hann, sem svo var frásneiddur öllu sjálfshrósi, öllum sjálfspóttu. Og er það þá ekki satt, sem eg í öndverðu sagði, að líf hans hafi verið eptirtektavert, fagurt og heiðarlegt, og þess verðugt, að því sè á lopt haldið? Eða virðist yður ei, að hær sè það skarð orðið, sem örðugt sè að fylla; það rúm autt, sem fáir sèu færir að setjast í? Ó, von er þá, þó harmur sè á því heimili, hvaðan hann nýlega var úthafinn, þó ekkja hans niðurbeygð fylgi líki hans, þó börn hans með grátnum huga mæni eptir honum, þó vinir hans og kunníngjar sárt harmi hans missi, þó sèrhver, sem ann þessu landi, sem elskar sanna menntun, tregi

fráfall hans, sem var þess sómi, vísindanna útvalið verkfæri.

En er það þá ekkert annað, en sorgarvein, en harmatölur, sem hær skulu heyrast, eintóm tár, sem hær skulu renna, sviði saknaðarins einn búa í brjósti oss? Eða, hvar erum vèr þá staddir? Vèr stöndum að vísu í kríng um lík andaðs ástvinar, er dauðinn sleit hart nær hastarlega úr höndum oss; en vèr stöndum líka í kristnu musteri, í guðs húsi, þar sem trúarinnar og vonarinnar raust hljómar, þar sem hið helga orð er boðað, um hvert það heitir, að það veiti bót allra meina. Ó, svo látum oss opna hið hrygga hjartað fyrir þeirri huggun, sem sjálfur himinn lætur í tæ; látum oss þakka guði, sem lætur sorg og huggun ávallt haldast í hendur, sem aldrei leggur svo byrði á herðar, að hann ekki líka veiti styrk að bera hana. Og svo látum oss þá vel hugfesta oss þá huggun, sem hær frambyðst oss, og vor fyrsta huggun er þá þetta: þitt stríð, sæli framliðni, er nú úti, öll mæða þessa lífs á enda; þín leið hær á jörðu var ekki ávallt blómum stráð, mörg sorg lagðist þúngt á þitt hjarta; þú barst þinn kross með miklu þolgæði, með sjaldgæfri stillingu; aldrei heyrðist nokkurt óþolinmædis-yrði af vörum þær; hvað sem mætti, geymdir þú hjarta þitt rósamt, og guði treystandi. En lof sè guði, nú er því öllu lokið, þitt stríð á enda, þú feingið hvíld; því grafarinnar ró fær eingin jarðnesk mæða, ekkert stundlegt böl framar raskað. Eingill með



brugðnu sverði gætir bústaða hinna framliðnu; inn fyrir þeirra takmark fær ekkert andstreymi brotitz. Já, frið hefir þú nú feingið, sæli framliðni, ekki einúngis grafarinnar frið, heldur líka himinsins. Dauðinn er ekkert, hann er einúngis eitt augnablik, einúngis flutningur frá hinu ófullkomna til hins fullkomna; dauðinn er uppsvelgdur í sigur; það hefir þú nú sjálfur reynt; þín þrautgóða sál hefir nú hrist af sér sín jarðnesku fjötur, og laus og liðug flögrar hún nú nær háseti hins eilífa. Það sem vèr duppti klæddir einúngis leiðum í getgátu og trúum, það er nú bert og nakið fyrir þér, það sem vèr nú grillum til, líka sem í ljósaskiptum, það sér þú nú augliti til auglitis. Þú ert nú kominn þángað, hvar brunnur vizkunnar er, ert seztur við þá iðju í hinni himnesku Jerúsalem, sem aldrei lýir. Og svo er það þá að eins hið jarðneska, sem er hnigið í dauðans djúp, og sem vèr nú viljum skila jörðunni aptur, þinn ædri partur lifir enn, og er kominn til andanna rétta heimkynna, til bústaða hinna sælu himinbúa. Ó, hver veit, nema þinn sæli andi má ske á þessari stundu með hluttekning dvelji hjá þeim, sem hær harma þinn missi. Hjarta vort elskar þessa hugsun. Og er það þá ekki, sem vèr heyrum þig frá sælunnar bústöðum hugga þína ástvini, eins og vèr heyrum þig hrópa til þeirra: „Grátið ekki yfir mér, gætið hófs í yðar harmi; mér líður vel, mig snertir ekkert jarðneskt böl. Að sýnilegum návistum er eg að vísu frá ykkur farinn, en guð mun vera með

ykkur. Þið hafið að vísu misst ykkar jarðneska föður og forsorgara, en hann lifir samt, sem er skjól ekknanna og faðir hinna föðurlausu; hann mun vera með ykkur. Varpið allri ykkar áhyggju upp á hann, honum er annt um ykkur, hann mun ekki sleppa hendi af ykkur, ekki yfirgefa; þið getið því hughraust sagt: Drottinn er vor hjálpari, vèr viljum ekki kvíða“.

Ó, látum oss því hugstyrkva flytja það, sem af jörðu er tekið, aptur í jarðarinnar skaut; þökkum guði fyrir vors vinar fagra, uppbyggilega líf, fyrir allt það gagn, er hann vann heiminum, fyrir alla þá gleði, er guð veitti honum, fyrir alla þá mæðu, með hverri hann batt hjarta hans enn fastara við sig. Þökkum guði fyrir það, að hann tók hann hëðan í tæka tíð, enn þótt of snemma fyrir oss. Þökkum guði fyrir þann blíða, fagra dauða, með hverjum hann gaf honum að enda sitt líf. Veit oss nú líka, ó faðir, sem honum erum sviptir, og sem með honum höfum misst þann, sem var vorum sambúðum til svo mikillar prýði, veit oss nægð þinnar náðar, svo að vèr líka fáum lifað þèr til dýrðar, oss og meðbræðrum til gagns, og gef landi voru sem flesta honum líka. Send þinn anda, sem líka heitir huggunarinnar andi, hans syrgjandi ekkjufrú, hans föðurlausu börnum, hans harmþrúngnu vinum og hans þjónum, svo að vèr allir megum halda oss til þín í trú og kærleika, og ávallt verðum fastari í þeirri sannfæring, að allt hljóti að þèna þeim til

góðs, sem þig elska. Já, guð drottinn blessi þig, sæli framliðni, og varðveiti oss, sem enn þá teljumst í tölu hinna lifendu; drottinn láti sína ásjónu lýsa yfir þig á landi sælunnar, og sè oss náðugur, sem enn þá dveljum hér í dauðlegleikans landi; drottinn upplypti sínu augliti yfir þig og oss, hann gefi þér frið útvaldra, og oss frið trúaðra. Amen.

---

## III.

## Líkræða,

flutt í kirkjunni af  
 prófessor og doctor theol. herra **P. Pjeturssyni**,  
 ridd. af dannebr.

Sem einn af lærisveinum hins framliðna er eg geinginn híngað, til að mæla fáein orð að skilnaði yfir moldum hans, með fram eptir tilmælum nokkurra annara hér verandi lærisveina hans, og átti eg því bágra með, að skorast undan þessu, sem mig sjálfan lángaði til, að geta látið þá hjartanlegu virðingu í ljósi, sem eg ávallt hefi borið fyrir hinum framliðna, frá því eg var svo heppinn, að eiga hann fyrir kenniföður; jafnvel þó eg að hinu leytinu undir eins finni til þess, að eg var lítt fær um, að mæla eptir slíkan mann, og eg nú finni til þess, að eg get eingu bætt við það, sem af hálfu kristilegrar kirkju er búið að tala um hans frábæru mannkosti. En það er ekki heldur ætlazt til annars af mér, en að eg beri einfaldlega fram skilnaðarkveðju viðstaddra lærisveina, sem elskuðu hann og virtu.

Einginn okkar held eg hafi búið við, að honum yrði kippt svo bráðlega burt frá okkur. Hann var



nú kominn til hvíldar og næðis eptir lánga og dyggva embættisþjónustu, og við bjuggumst allir við, að hann mundi enn eiga eptir nokkra stund ólifaða, og óskuðum fósturjörðu okkar til heilla með, að hann henni til vegs og sóma gæti nú hér eptireingaungu gefið sig við þeim vísindalegu störfum, sem honum létu svo forkunnar-vel. En drottinn þókknaðist að hafa það öðruvísi, hans vegir eru órannsakanlegir; hann tók þann framliðna heim til sín, þegar speki hans þókti hentugast, og hversu mikill sem missir og söknuður okkar er, þá eigum við þó, ef við erum kristilega sinnnaðir, að geta sagt af hjarta: drottinn gaf, drottinn burt tók, sè nafnið drottins vegsamað; því þessi orð lýsa kristilegu þakklæti og kristilegum söknuði. Kristilegu þakklæti, að því leyti sem kristinn maður þakkar guði fyrir allt gott, sem verður á vegi hans í lífinu, og kristilegum söknuði, að því leyti sem kristinn maður tregar að sönnu missi hinnar góðu gjafar, en lætur þó söknuð sinn stjórna af undirgefni undir guðs vilja. Við þetta sorglega og hátíðlega tækifæri sèu því þessi orð okkur hugföst: drottinn gaf, drottinn burt tók, sè nafnið drottins vegsamað.

---

Drottinn gaf okkur þenna framliðna bróður; hann var sannarleg guðs-gjöf, og gjöfin var *mikil*. Það er eðlilegt, þó við, meðan við sem únglingar nutum tilsagnar hins framliðna, tækjum helst eptir því, hvað ágætur kennari hann var, þó við þá helz

tækjum eptir hans frábæra lipurleik í að kenna, sem, samfara hans blíða og ástúðlega viðmóti, gjörði okkur svo lætt fyrir að nema; það er eðlilegt, þó við á þeim aldri einkanlega virtum og elskuðum hann, sem afbragðs-gáfaðan, lipran og alúðarfullan kennara. Um annað gátum við þá ekki eiginlega dæmt; og þetta hefði líka verið nóg þakklætisefni við drottinn, því það er sönn velgjörð guðs, þegar hann lætur æskumanninn fá slíkan kennara. En virðing okkar fyrir hinum framliðna hefir allt af aukizt meir og meir, eptir því sem við sjálfir vitkuðumst betur, eptir því sem sjóndeildarhríngur sjálfra okkar stækkaði, og við lærðum að skoða líf hans frá fleiri hliðum, og sáum, hve mikið honum var gefið á svo margan hátt, og hve mikið okkur var gefið í honum, og nú getum við vissulega allir af fullri sannfæringu hjartans sagt, að hann var sannarleg guðs-gjöf; nú finnum við vissulega allir til þess, að við höfum orsök til að þakka guði, ekki einúngis fyrir það, að hann lét okkur hlotnast, að hafa hann fyrir kenniföður, heldur og einnig fyrir hitt, að hann lét hann fæðast og lifa sem Íslending. Sérhver þjóð, þó hún sè fremri og fjölmennari, en við Íslendingar, má þakka góðum guði fyrir slíka gjöf, þegar hann lætur sitt guðlega gáfnaljós skína svo skært hjá einhverjum manni, að það getur stráð geislum sínum á menntalíf þjóðarinnar og borið ávöxtu fyrir alda og óborna. Þess háttar menn eru sjaldgæf guðs-gjöf hjá öllum þjóðum; en því

sjaldgæfari og stærri sem gjöfin er, því fremur má hún vekja hverja þjóð til þakklætis við drottinn, og það er einginn efi á því, að hinn framliðna má telja með slíkum mönnum. Guð hafði gefið honum svo óvenjulega mikið; gáfurnar voru frábærar, skarpleikinn mikill, fegurðar-tilfinnanin sérlega næm, ímyndunaraflíð fjörugt og hugsanirnar háfleygar; fáum er hvert um sig gefið í eins ríkulegum mæli, og honum, og fæstum að hafa það allt eins fagurlega sameinað og hann; hjá honum bar ekkert annað ofurliða, heldur var það allt í innilegri og lifandi samhljóðan, og það er þessi samhljóðan, sem gjörir gáfurnar svo fagrar; það er hún, sem gjörði hinn framliðna að svo frábærum snillíngi, og hvað eina að snilldarverki, sem frá hans hendi kom, hvort heldur það var í bundinni eða óbundinni ræðu. Það leiddi mig of langt, ef eg færi að leiða rök til þessa af ritum hans, og hvað þarf að leiða rök að því, sem er lifandi sannfæring vor allra, og allra, sem til hans þekktu, og sem verður að lifandi sannfæringu hvers eins, sem tekur sér rit hans í hönd, og ber nokkurt skynbragð á gáfna-snilld? Honum var mikið gefið, en hann varði því líka trúlega; hann vissi, að af þeim, sem mikið er gefið, verður mikils krafist; þess vegna vann hann, meðan dagur vannst til. Eins og gáfurnar voru afbragð, eins var þolið og iðjusemin ópreytandi, og því var ekki furða, þó hann væri vísindamaður, og þó hann afkastaði svo miklu; en það er næsta fágætt, að aðrir

eins gáfumenn sèu jafnmiklir iðjumenn, og hann var. Vegna sinnar einstaklegu iðjusemi fèkk hann líka tíma til að vanda allt sem hann gjörði, og hann vandaði það allt, því hans næma fegurðartilfinnan leyfði honum ekki að kasta höndunum til neins, eða skilja eptir misfellur eða ójöfnur á nokkrum hlut. En í því lýsti sèr hans frábæra gáfna-ljós, að hve mikið sem hann vandaði sig, þá misstist hvorki fjör nè lipurleiki. Þetta kom til af því, að hann hafði fullkomið vald yfir hugsunum sínum, og það gat hann haft, af því hann hafði fullkomið vald yfir málinu, og gat valið hverri hugsun þann snotrasta og heppilegasta búníng. Hafi nokkur maður gjörþekkt eðli íslenzka málsins í þess innstu og dýpstu rótum, þá var það hinn framliðni, og hann ekki einúngis *gjörþekkti* það, heldur var hann því svo *innlífður*, að það var eins og hann lifði í málinu, og eins og uppspretta málsins lifði í honum, og í ritum hans runnu lifandi straumar hins hreina og fagra máls út um landið, og út um önnur lönd, og gjörðu hann nafnfrægan hér og annarstaðar, og þó leitaði hann ekki sjálfum sèr frægðar, heldur aflaði málið honum frægðar, af því hann víðfrægði það, og því mun minnínгу hans verða haldið uppi af máli okkar, meðan það lifir. Við höfum því tilefni til að þakka guði fyrir þessa miklu gjöf.

Gjöfin var bæði mikil og *góð*; því hinn framliðni var ekki einúngis mikill maður, heldur og *góð-*

ur maður; góðmennskan auðkennir alla hans æfi; hún lýsti sér jafnan í hans blíða og ástúðlega viðmóti, í hans gáfudu og gamansömu viðræðum og í öllu hans dagfari; elskurík umgeingni hans við konu og börn, við vini og vandamenn, og ljúfmennska hans við alla er alkunn; stilling hans og hugarrósemi var fram í dauðann sjálfri sér lík; hún var spröttin af kristilegri rót, af óbifanlegu trausti á guðs föðurlegu gæzku, og öll hans breytni lýsir því, að það er kveðið af hjarta, sem stendur í einum sálmi hans:

Ó, hvað veikan það hressir huga,  
að hefja klökkva sál til þín;  
ekkert mótlæti mig kann buga,  
meðan eg veit þú gætir mín;  
allt skapað birtir almátt þinn,  
alstaðar eg þinn kærleik finn.

Þessi orð sýna okkur, hvaðan hann leitaði sér sálarstyrks í lífinu, og hvers vegna hann gat tekið dauðanum með þeirri hugarrósemi og undirgefni undir guðs vilja, sem hann gjörði. Líf hans var eins og ljós; það logaði skært og fagurlega, en þó jafnt og stöðugt; af gáfum hans og hjartans blíðu lagði birtu nær og fjær, þangað til hann slokknaði út af, eins og ljós; af því hann var sáttur við lífið, átti hann svo hægt með að sætta sig við dauðann. Nú er ljósið slokknað, nú er hann horfinn oss að sýnilegum návistum, og vor himneski faðir hefir tekið þessa miklu og góðu gjöf til sín aptur. Himnafaðirinn



mun virða okkur til vorkunar, þó söknuður okkar sè mikill, þó eptirsjón okkar sè mikil, því vèr höfum eptir miklu að sjá. Æ, eg vil ekki tala um harm ekkjunnar og barnanna, sem hafa misst blíðasta mann og bezta föður; það væri til að ýfa hjartasár þeirra enn meir, að fara þar um fleiri orðum; eg vil heldur ekki minnast á söknuð vina hans og vandamanna, sem trega tryggvan og ástúðlegan vin, og trega hann því meir, sem þeir betur finna til þess, að það er sjaldgæft á hinum efri árum æfinnar, að nýir vinir geti bætt missi trúrra og einlægra fornvina. En eg tala einkanlega um okkur lærisveina hins framlíðna; og þegar eg tala um lærisveina hans, þá get eg talað um alla Íslendínga; því leingi munum við Íslendíngar geta lært af honum, og numið margan fróðleik af ritum hans. Við höfum eptir miklu að sjá, og okkur finnst það nú, eins og missirinn sè óbætánlegur, af því við höfum svo fáa vísindamenn og aungvan til að skipa í skarðið, þar sem hann stóð svo framarlega í flokki okkar, og í mörgu tilliti vissulega fremstur, og það sem eykur á söknuð vorn, er sèr í lagi það, að við eins og sjáum í anda, hve miklu hann enn hefði getað afkastað fósturjörðu okkar til frægðar og heilla, hefði honum unnizt aldur til. En það var drottinn, sem tók hann burtu, og því megum við ekki mögla, heldur ber oss í auðmýkt að beygja oss undir hans vísdómsfulla vilja, og treysta því, að hann einn

veit, hvað bezt hagar, og að hann kallar sín börn burt á hæfilegasta tíma.

Með þessari huggun í hjörtum okkar kveðjum við þá moldir þínar, framliðni kennifaðir. Þitt dæmi skal hvetja okkur, til að lifa kristilega, og leitast við að gagna fósturjörðu okkar, hver í sínum verkahring. Minning þín lifir í blessun; hún mun æ lifa heiðruð og elskuð í hjörtum okkar, í hjörtum ástvina þinna, í hjörtum allra góðra Íslendinga; og með ritum þínum hefir þú reist þér þann minnisvarða, sem tíminn mun eiga bággt með að eyða; sjálfur lifir þú sæll hjá guði; honum sè þökk fyrir þína liðnu æfi; hann gaf þig, hann tók þig burt; hans nafn sè vegsamað. Amen.



## IV.

### Grafskriptir.

#### 1. Grafskript<sup>1</sup>.

†

Hér liggur

duptið jarðneska, sem dáið gat,

hjúpur ódauðlegs anda

**Sveinbjarnar Egilssonar** Drs.

Hann fæddist 6. marz 1791;

giptist 20. júní 1822

jómfr. Helgu Benedicts dóttur fædd. Gröndal,

varð kennari við Íslands lærða skóla

27. marz 1819,

lærifaðir í guðfræði 27. nóvember 1843,

skólameistari í Reykjavíkur lærða skóla

27. apríl 1846;

flutti alfari til andanna föður, hvar

hans arfahluti og hugur var,

17. ágúst 1852.

Eptir þreyir ekkja hans og 9 börn,

3 biðu föður síns í blíð-

heimum.

---

<sup>1</sup>) Prentuð áður á lausu blaði og í „Ný Tíð.“ 1852, 78. bls.

Hans lærdómur, gáfnasnilld, og smekkvísi,  
 hæversk glaðværð og hjartagæzka,  
 hans tállausa tryggð, tilgjörðarlaust  
 lítillæti og ljúfmennska  
 áunnu honum

frægð og heiður utanlands og innan,  
 ást og kærleika og sáran söknuð  
 vandamanna og vina.

Þegar allt það hversdagslega er fyrir laungu  
 gleymt, mun hans um aldur getið  
 verða meðal Íslands helztu  
 merkismanna;

því

„Sá vísi eptirskilur meira nafn en þúsund  
 aðrir, og þó hann gáangi til hvíldar,  
 eykur hann það“.

Sírak, 39., v. 15.

---

Svo minnst vinar síns

*P. Seb.*

---

## 2. Grafskript.

†

Conduntur cineres tumulo,  
lux ignea coelo

**Sveinbjörnig Egilssonii,**

qui natus est d. 6. Martii a. d. 1791, collega fuit  
scholae Bessastadensis ab a. 1819 usque ad a. 1846,  
rector scholae Reykjavicanae ab a. 1846 usque ad a.  
1851, creatus Doctor Theologiae Universitatis Vratis-  
laviensis a. d. 1843, ab a. d. 1825 Societatis Regiae  
Antiquariorum Septemtrionalium socius.

Uxorem duxit a. 1822:

Helgam Benedicti Gröndal,  
quacum liberos duodecim produxit.

Vir egregiis dotibus animi praeditus, ingenio acutis-  
simo, poeta lepidissimus et dulcissimus, Graecae et  
Latinae linguae cultor sagacissimus; linguarum  
borealium antiquarum omnium sui temporis inve-  
stigatorem versatissimus et longe acutissimus inter-  
pres, omnem splendorem pulchritudinis et decoris  
amans.

Habuit amorem principium et regulam totius vitae,  
vita autem eum docuit, perversos animos amore non  
esse mulcendos.

Ille vixit, amicus Musarum et Apollinis ocellus, dei  
supremi nomen metuens et amans, gloriam patriae  
sollicita assiduitate augens, etsi res publicas non  
tractaret, donec die septimo decimo mensis Augusti



anno domini 1852 animam tranquillo somno leniter  
 exspiravit, sanctum lumen, divina sapientia coele-  
 stique amore splendens, sicuti animus eius non fuit  
 nisi sancta tranquillitas pacis et amoris.

Omnes docti et iusti eum, e mediis operibus, non  
 solum subtilibus et doctis, sed etiam sublimibus et  
 poëticis, subita morte ereptum lugent; ille enim non  
 solum Islandiae, verum etiam omni cohorti alumno-  
 rum Musarum cuiuscunque gentis subtilis et elegans  
 nuntius fuit sapientiae et doctorum studiorum.

Desine iam cantum grata Philomela sub umbra,  
 Calliope lacrymans, funere tacta, dolet.  
 Moestaque cur yolitas, tenuis fringilla, per auras?  
 Desine, et ad bustum iam tibi quaere locum.  
 Conditur hoc tumulo mortalis corporis umbra;  
 Gloria morte carens regna beata tenet.  
 Audiet in coelis divini carmina Homeri,  
 Et datum viva voce Nasonis opus.  
 Elysiumque colens, nunc accipe laetus amicum  
 Doctum, dulciloquum, docte Catulle, tuum.  
 Ars quoque et ingenium vivunt, et mentis acumen:  
 Haec violare licet non, fera Parca, tibi.

Μακάροι οἱ πράξεις, ὅτι αὐτοὶ κληρονομήσουσι  
 τὴν γῆν.

Μακάροι οἱ εἰρηνοποιοὶ, ὅτι αὐτοὶ υἱοὶ Θεοῦ  
 κληθήσονται.

Matth.

*B. Gröndal.*

(Latínau snúin á íslenzku)<sup>1</sup>.

†

Dylur mold                      en á himni lifir  
dauðlegar leifar,              ljósfögur sál

### **Sveinbjarnar Egilssonar,**

sem fæddist 6. marz 1791, var kennari við Bessastaðaskóla frá 1819 til 1846, rektor Reykjavíkurskóla frá 1846 til 1851, varð Doctor í guðfræði við Bresláarháskóla 1843, og frá 1825 meðlimur hins konúnglega norræna fornfræðafélags. Giptist 1822 Helgu B. Gröndal, og eignaðist með henni tólf börn.

Hann var gæddur frábæru atgjörvi andans, skarpvitur og djúpsær, lipurt og ágætt skáld; hann var hinn skarpasti í grískri og latínskri málvísi, og djúpsæjastur allra þeirra, sem á hans öld stundudu og þýddu forntúngu norðurlanda. Hann unni allri fegurð, og elskaði allt það, sem var heiðarlegt og gott. Elskan var grundvöllur og leiðarstjarna lífs hans, en lífið kenndi honum það, að elskan er ekki ætíð einhlít í öllum atvikum mannlegrar æfi.

Hann var ástvinur menntagyðjanna, og eptirlæti þess guðdóms, sem af er runnin skáldleg fegurð og inn-dællir hljómar; hann óttaðist og elskaði guð, og jók frægð fósturjarðar sinnar með óþreytanlegri iðju,

---

<sup>1</sup>) Prentuð áður í 4. ári Þjóðólfs 1852, 361. bls.

þángað til hann, hinn 17. dag ágústmánaðar 1852,  
leið aptur til drottins, sem hann var áður hjá, eins  
og heilagt ljós, skínandi af himneskri vizku og  
elskuríkum anda, eins og líf hans og andi ætíð var  
heilög kyrrð friðar og elsku.

---

Allir menntaðir og rèttsýnir menn munu harma  
þann, sem skjótur dauði svipti burtu frá mörgum  
verkum, ekki einúngis fullum af lærdómi og djúp-  
sæjum skarpleika, heldur og einnig af háleitri og  
skáldlegri fegurð; því að hann var ekki einúngis  
fyrir Ísland eitt, heldur og líka fyrir menntaða menn  
allra þjóða, djúpsær og lipur í rannsóknum vizk-  
unnar og vísindanna.

---

Hættu að sýngja, svalan mæra,  
er situr um kvöld í dimmum lund.  
Þú hlýtur einnig fórn að færa,  
er fagurblíð um harmastund  
saunggyðjan krýpur kumlum hjá,  
kveinandi yfir fölvum ná.

Von er þú grátir, gyðjan fríða,  
geinginn er burtu sonur þinn.  
Þóknaðist drottni lands og lýða  
að leiða þángað ástvin sinn,  
þar sem ei haustið þjakar reyr,  
þar sem að gleðin aldrei deyr.

Nú hylur grund und björtum blóma  
 brostið og dáið augna ljós;  
 verkin hans æ hjá lýðum ljóma,  
 þó leiðið prýði eingin rós;  
 vel sè þèr blíða og hjarta sál,  
 braut þín er ekki leingur hál.

---

Sælir eru hógværir, því að þeir munu landið hljóta.  
 Sælir eru þeir, sem friðinn semja, því að þeir munu  
 guðs börn kallaðir verða.

Matth.

*B. Gröndal.*

---

## V.

## Erfiljóð.

## 1.

Minníngar-ljóð

eptir

**Sveinbjörn Egilsson.**

## I.

Sit eg á hugar ljósu leiti,  
 lít eg eyju frosta hvíta;  
 lít eg sævar leiðir yfir,  
 lít eg tind með jökul-linda.  
 Lít eg geim í ljósi og húmi  
 líða fram að settum tíðum;  
 leiði eg sjónum líf og dauða,  
 lífið deyja og burtu svífa.

## II.

Stendur kyrr, þótt geysi um grundir  
 grimmur dauði og veiti nauðir,  
 girður ís og gliti ljósu  
 Garðarshólmi ellivarður.  
 Sveipar himinn silfurhjúpi  
 svalan tind og jökul-linda;  
 það eru gljáar gullinblæjur  
 geislarósa norðurljósa.



## III.

Fósturjörð og björgin bezta,  
 breiðum girð af öldu - leiðum!  
 setta hefir þig dýrðar drottinn  
 dyggilega styrktar - tryggur!  
 Faldinn sknúði frosta köldu  
 fölnar aldrei blóminn kaldur;  
 hafinn krapta hitans yfir  
 hann mun vara, og aldrei farast.

## IV.

Móður - mold, sem blæju breiðir  
 blíð á ná, þótt harmar sviði!  
 það, sem af þér fyrrum fæðist,  
 fer til þín, er lífið dvínar.  
 Sjálf þú fæðir, sjálf þú leiðir  
 sjóta fjöld að högum völdum;  
 aptur tekur, og ljær svo líki  
 ljúfa grund að hinnsta blundi.

## V.

Sit eg á hugar ljósu leiti,  
 lít eg grund og skógarlundi;  
 yfir lauf og inndælt bifast  
 aldin - sknúð í daggar - úða;  
 leika geislar litum ríkir,  
 ljósir boðar aptanroða;  
 dropar blunda á blómgum linda,  
 bliki kasta daggar - rastir.

## VI.

Þar eru meiðir margir friðir;  
munarblær í limi hrærist;  
ljúfum rómi í rökkurs húmi  
rennur andi af himins landi.  
Aldin hneigjast; lafin lægjast,  
sem leggi að eyru til að heyra;  
undur - hljóð með furðu - friði  
frævis - tjöldin sveipar öldum.

## VII.

Líða margar hlyns frá hörgi  
hreima - raddir að eyrum kvaddar;  
vopna - hljóð og víga - kvæði;  
Víngrnis hjaldur á búngum skjalda;  
hörpu - eymur, hvellur rómur,  
hetjum súnginn á Egils túngu,  
dunar í fjarska; svásir svanir  
svífa und skýjum daggar - hlýjum.

## VIII.

Reistar eru við rætur traustar  
reginstofna, viðjum ofnar,  
gullnar töflur, að grasi fallnar,  
grafnar letri og mynda - safni.  
Glóir fold af ægis eldi,  
undnum ljóma og grænum blóma.  
Aldin hneigjast; lafin lægjast,  
lángar að sjá hvað gullið tjáir.

## IX.

Fagur er reitur frægra að líta,  
 falinn blóma og gullnum ljóma;  
 þar eru nöfn, er lýðir nefna,  
 numin dauða úr geimnum auða.  
 Faldinn grænum grasa - reinum  
 girðir hann djúpur ægis hjúpur  
 meginkaldri marar - öldu,  
 munaðblárri, unaðgljárri.

## X.

Þitt er nafn hjá frægum nöfnum,  
 nýt er fæddi eyjan hvíta,  
 ritað á gylltan, gulli smeltan,  
 glæstan skjöld und meiða tjöldum;  
 þú, sem mestan heiður og hæstan  
 hefir af þúngri Snorra túngu;  
 fræddir mig, og feril greiddir,  
 faðir minn, með iðju þinni.

## XI.

Þeir eru meiðir meginfríðir  
 mætum runnir af sama brunni;  
 aldin-blómi af frævum földum  
 fastrar iðju, vermdur af gyðju.  
 Frægir sáðu og lýðum læðu  
 loga, kveikta regns við boga;  
 þær hefir sólir eftir og alið  
 uppheims laga-valdi Saga.

## XII.

Heil sèrtú, af æðstum alin  
 uppheims - sjóla, á foldar bóli,  
 lítil að sjá, en firnum fáin  
 falin iðja, er guð vill styðja!  
 Einnig þú í blóma búi  
 býrð og felst, en ótal dýrðir  
 kraptur hulinn sjónum selur;  
 sæðið leiðir að gildum meiði.

## XIII.

Það ertú, sem geisla gljáan  
 gefur sál, og fegrar málið;  
 það ertú, sem afli nýju  
 andann mætan verða lætur.  
 Það ertú, sem beisku bægir  
 bölví, og sárum öfundar tárur;  
 andi drottins, ofan sendur  
 ást að vekja, böl að hrekja.

## XIV.

Þú, sem niður leiðst að láði,  
 ljúf og vær, úr djúpi tæru;  
 vizkurík, en samt þig veika  
 vel skiljandi, hógvær lilja!  
 Þú, sem sælu æðstur sjóli  
 sjálfur bjó með krapti nógum;  
 stoðin lýða, styrkur þjóða,  
 stöðvuð ei, hve máttú deyja?

## XV.

Hermir skjöldur harmi faldinn,  
 helltur yfir tára bifi:  
 „Þér sè vel, sem hógvær hvílir,  
 helgum undinn dauða-blundi;  
 góðan lèztu guð þinn ráða,  
 gafst ei um hrósið foldar ljósa;  
 veitir þér nú skrautið skæra  
 skapari þinn fyrir ásján sinni“.

## XVI.

„Þín munu verkin mörg að marki  
 moldum lifa þjóðar yfir;  
 andans ljós, er kveiktirð' endur,  
 ei mun deyja á Garðarseyju.  
 Og þótt aumir öfundar-rómi  
 allir vilji, að helzt það falli,  
 þeim skal sjálfum snaran bölvuð  
 snúin að hjaldri; þrífst þeir aldri!“

## XVII.

Sit eg á hugar ljósu leiti,  
 lít eg eyju frosta hvíta.  
 Lít eg af aldar lágri foldu  
 logana skæru um himins boga.  
 Lofaður sèrtú, ljósum yfir,  
 lýða sjóli á alvalds stóli!  
 Lofaður sèrtú, hæstur hafinn!  
 Heiður sè þér um veröld breiða!



## XVIII.

Dýrð sè þèr og skrautið skæra,  
 skaparinn góði, faðir þjóða;  
 fyrir þèr ægir alheims logar  
 eins í smáu, sem í háu.  
 Styrk þú veittir og andans orku  
 Ísþjóð af mætti góðum;  
 valdir stað, og ríkum ráðum  
 rættan allt í tíma settir.

## XIX.

Lof þitt hljómar ljósum ofar,  
 á loga-braut, í himins skautum;  
 lof þitt dreymir lilja, er sefur  
 lilju-draumi blám hjá straumi.  
 Lof þitt bárur lángr hreifa;  
 lifir það jökul-tindum yfir;  
 lof þitt hljómar um öld og æfi,  
 engla sungið hátt af túngum!

## XX.

Sælt er jöfur slíkan að hafa;  
 slíkan drottinn, engu líkan; —  
 guð er faðir hverra góðra;  
 geymir þá í betra heimi. —  
 Heill sèrtú, að himinstóli  
 hafinn yfir dauðra grafir,  
 andinn sæll, að himins höllu!  
 horfinn svárum jarðar tárur!

*Benedikt Gröndal.*

---

## 2.

**Sveinbjörn Egilsson.**

## I.

Sorti, Ísland! sígur á bjarta  
 sólu vonar þinna sona:  
 út er hafinn enn til grafar  
 einhver mesti þeirra og bezti —  
 Jónas bæði og Bjarni áður  
 burtu klipptust, lífi sviptir —  
 og Helja nöpur heimtar döprum  
 Hómer vorn að skapadómi

## II.

Harpan þegir; því er eigi  
 þetta kyn að mennta vini  
 skeri alla, að skyldi falla  
 skáldið blíða í miðjum klíðum.  
 Hnípið er land; en leystur andi  
 ljósra heim til sólar-geima  
 svífur, þar er svinnur skari  
*Sveinbjörns vonar Egilssonar.*

## III.

Gráttu fold, því fela áttu  
 fagursmiðinn máls og braga,  
 snillíng mikinn, snjallan í öllu  
 og snoturmenni — við atburð þenna;  
 gráttu björk á grænni mörku,  
 gráttu rós á blómsveig ljósum;  
 grátið Braga úr helju hagan,  
 hann því saung um ykkur laungum.

## IV.

En þó að veini stokkar og steinar,  
 standa norna álög fornu:  
 traustur fellur eins viður að velli  
 og veikbyggt fis, eða laufblað visið.  
 Drottinn jók oss tár, því tók nú  
 til sín hann strax, fremur en annan.  
 Hulið ráð, en hulan bráðum  
 hverfur frá, vèr skynjað fáum.

## V.

Burt í friði ljós er liðið,  
 lærdóms blóm og mennta sómi;  
 Snorra og Ara er þá farinn  
 ítur jafni; frónið sýtir.  
 Verndareingil vèr þar feingum  
 vorrar túngu fornu og úngu,  
 því rétta kvistu að rótum misstum  
 rekja verk hans frægu og merku.

## VI.

Meðan Ísa aldnir rísa  
úti á hafi tindar úr kafi,  
og meðan íslenzkt mál óbrjálað  
mælir þjóð á norður slóðum:  
*hans* mun *nafn* í heiðri jafnan  
hafið yfir sorta grafar;  
*hans* munu *rit*, meðan höldar vita,  
halda upp þjóðar frægð um aldur.

*J. Þorleifsson.*

---

## 3.

**Sveinbjörn Egilsson<sup>1</sup>.**

Grjótaldar rær gildi  
geðreinar þorsteini,  
bergmōra glymr bára  
bið ek lýða kyn hlýða!

REFR SKÁLD.

## I.

„Út heyri ek svan sveita  
sáraþorns“, en fornra  
minnist benþiðurr meina,  
málmfjallaðan gjalla;  
nú kveðr ná hinn ítra  
Njóts geim-rötuð heima,  
þann er af mærdarmönnum  
mest vann öld at flestu.

## II.

Dapra kveðr hann drúpa  
drótt, er fyrrum sótti,  
þá var annat hljóð unnar,  
ólm at Garðarshólma:  
lagðr er nú sá er lögðis  
lýðs nam hyggju þýða,  
hans kveða horfit svörði  
hold, í vígðri moldu.

---

<sup>1)</sup> Þessi ljóð eru áður prentuð í 13. ári „Nýrra Félagsrita“  
157.—162. bls., og eftir þeim eru þau hér prentuð.

## III.

Autt er út at líta  
 allt Vífðblinda galtar,  
 köld er utan alda,  
 eið á norðrleiðir:  
 frystin sitr þar fóstura  
 fól í ægi svölum,  
 æstan fellr af alla  
 Ýmis blóð, fornra ljóða.

## IV.

Hulit var húms í dölum  
 heims, er þángat beimar  
 báru nýtir frá neytri  
 Noregs strönd, ofar löndum,  
 orð þat, er enn má verða  
 oss, ef viljum hnossir,  
 heims í hverfum glaumi  
 huggun mest og von flestum.

## V.

Hulit var oss, þó at, ála,  
 óð stofnuðu góðan  
 forn-skáld, fjörnir kindar  
 fur goðmálgra bura:  
 hulit var oss, því at eli  
 ei kunnum vèr gunnar,  
 því er gjörði sjöt sverða  
 slíng at orðapíngi.

## VI.

Einum eigum at launa  
allt, er fyrnska svalt-a,  
þeim er hodd úr húmi  
hóf fram mærdar glamma:  
holtr var honum at öllu  
hinn, er óð gat svinnan —  
nú er hann lík, ok Loki  
leikr af náinn bleika.

## VII.

Hniginn er heims at dómi  
hinn, er öld at minnum  
opt með ærnri giptu  
óð um myrkr ljóða:  
hver mun nú, sá er nemi  
Nás hallar svo allan  
fjörð, of lýsa fyrðum  
fornaldar um vè skálda?

## VIII.

Hver mun endr, sá er unda  
eins kunni vel runninn  
Kvásis dreyra hinn dýra,  
dádæran brag stæra,  
þann er áðr for öðrum,  
óð, kvað stillir ljóða,  
glaðr á girzkra þjóða  
grund nær Hellusundi?



## IX.

Engan veit ek, en ángs  
 enn mun þjóð of kenna,  
 vön mun öld, þó at aldir  
 enn víki, hans líka;  
 lengi mun þjóð of þrúgin  
 þess, er, trega vera,  
 kunni eins at inna  
 Yggjar feng fyrir drengjum.

## X.

Hnè, þar er hann nam skýja  
 hallar valdr of aldri,  
 góðr, við grand ei kendr,  
 gagnsæll vinr bragna,  
 sá er einn nam unnum  
 óðhrærandi mærum  
 megináss af megni  
 málmagaldrs at valda.

## XI.

Hnè þar hinnstr fornra,  
 heim sótti guð beinr,  
 traúðr em ek Tveggja greiða  
 tannstraum, fræðimanna:  
 víst var vitr at flestu  
 vinr minn ok svo hinna,  
 þeira er gátu salsætu,  
 sýlg Grímnis, lá Hrímnis.

## XII.

Farit hafði hinn fróði,  
 fornan þyl ek horna  
 Óðins straum af æði,  
 endr um mærdar lendur:  
 sótti glaðr at grýtttri  
 grund Parnassus sprunda,  
 hafði spurð, nè sparði,  
 spjöll af Dofrafjöllum.

## XIII.

Getit hafði, sá er gotnum  
 Gauts hyggju vann trygga,  
 sækidrukk ósvikinn  
 Sveims úr jötunheimum;  
 bergja nam á bjarga,  
 Boðn óx at þat, móðnis,  
 sunnr leit seimagrennir,  
 Són á-Helíkóni.

## XIV.

Óðs kveða endrgæði  
 allir til snimma fallinn,  
 daprast hugr af döpru,  
 drottinn minn, at inna:  
 „Bráðr, kvað borginmóði,  
 betr var fyrr of getin,  
 þá er foldgrepp fylgdum  
 fimbulheims um geima“.

## XV.

„Auð er erfimeiða,  
 ólmast Rán at hólmi,  
 elrisgrund, en ollu  
 Eylúðrs því brúðir:  
 eyðist forn, sízt, óðr,  
 ítr hollvinr hvítra  
 fornra fræðivarna  
 fór um æginn stóra“.

## XVI.

Svo kvað hrasn, en hrasna  
 heyrði ek orð um þat norðan,  
 drótt nemi Dvalins rættu  
 dýran þátt, um náttu:  
 flutti -orri, því, atta,  
 endr feigð lífi rendi,  
 dauðra dverga græði,  
 dagg-, — en ek mun þagna.

*G. Brynjúlfsson.*

---

## 4.

## Kveðið

við lát Drs. **S. Egilssonar.**

## I.

Þar fèll á fold  
 enn fjölvitri  
 Sveinbjörn Egils arfi;  
 sá bar jafnlyndi  
 í sorg og gleði,  
 en gegndi ei skjali guma.

## II.

Og þó hamíngjan  
 honum sýndi  
 hót hverflyndra vina,  
 var hann sem klettur,  
 og veik ei frá  
 skyldna sinna skeiði.

## III.

Þekkti eg  
 frá úngdóms aldri  
 ekki líka hans;  
 var fullorðinn  
 fárra ára  
 að menntum og mannúðleika.

## IV.

Svona fer dyggð  
 og dáðrekki,  
 vit og virkta hvað.  
 Eitt er þó eð öflga,  
 sem aldrei deyr:  
 rykti gott og rómur.

*P. Sveinsson.*

---

## 5.

## Við greptrun


Drs. **S. Egilssonar**, 27. dag ágúst. 1852.

Helgaður andi í himins dýrðar sölum  
 nú hrósar sigri yfir lífsins þraut,  
 og duptið, snortið dauðans vindblæ svölum,  
 í drottins friði geymir jarðarskaut.  
 En hans vèr söknum, harma reyrðir böndum,  
 hvers trautt jafníngrja munum eiga von;  
 því vèr þess yfir vinar moldum stöndum,  
 sem vissum dýrstan: Sveinbjörn Egilsson.

*Br. Oddsson.*

---







Lbs - Íslandssafn



100438918 - 8

